



Broj: 02-50-1-16-37/09

Sarajevo, 19. 10. 2009.

ZAPISNIK

37. sjednice Doma naroda

Parlamentarne skupštine Bosne i Hercegovine,

održane 19. 10. 2009. godine

Sjednica je počela u 11,05 sati.

Sjednicom je predsjedavao Ilija Filipović, predsjedavajući Doma naroda Parlamentarne skupštine BiH.

Sjednici je prisustvovalo 11 delegata.

Delegati Mladen Ivanić, Sulejman Tihić, Hilmo Neimarlija i Slobodan Šaraba opravdali su odsustvo.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija te sredstava javnog informiranja.

Dom naroda usvojio je sljedeći

DNEVNI RED

1. Odgovori na delegatska pitanja i delegatska pitanja;
2. Usvajanje Zapisnika 36. sjednice Doma naroda;
3. Izvještaj Zajedničke komisije oba doma o postizanju saglasnosti o identičnom tekstu Zakona o izmjenama i dopunama Zakona o osnovama sigurnosti saobraćaja na putevima u BiH;
4. Zahtjev Predstavničkog doma za razmatranje Prijedloga zakona o izmjenama i dopunama Zakona o slobodi pristupa informacijama u BiH po skraćenom postupku, u skladu s članom 121. Poslovnika Doma naroda;

5. Zahtjev Predstavničkog doma za razmatranje Prijedloga zakona o dopuni Zakona o službenom glasilu BiH po skraćenom postupku, u skladu s članom 121. Poslovnika Doma naroda;
6. Prijedlog zakona o primjeni Rimskog statuta Međunarodnog krivičnog suda i saradnji s Međunarodnim krivičnim sudom (drugo čitanje), predlagač: Vijeće ministara BiH;
7. Prijedlog zakona o izmjenama i dopunama Zakona o Pravobranilaštvu BiH (drugo čitanje), predlagač: Vijeće ministara BiH;
8. Prijedlog zakona o slobodnim zonama u BiH (drugo čitanje), predlagač: Vijeće ministara BiH;
9. Prijedlog zakona o izmjenama i dopunama Zakona o sportu u BiH (drugo čitanje), predlagač: Predstavnički dom;
10. Prijedlog zakona o izmjenama i dopunama Zakona o upravi (prvo čitanje), predlagač: Vijeće ministara BiH;
11. Prijedlog zakona o izmjenama i dopunama Zakona o krivičnom postupku BiH (prvo čitanje), predlagač: Vijeće ministara BiH;
12. Prijedlog zakona o Agenciji za prevenciju korupcije i koordinaciju borbe protiv korupcije (prvo čitanje), predlagač: Vijeće ministara BiH;
13. Izvještaj o izvršenju Budžeta institucija BiH i međunarodnih obaveza BiH za 2008. godinu; podnosilac: Predsjedništvo BiH;
14. Izvještaj Ureda za reviziju institucija BiH o reviziji Izvještaja o izvršenju Budžeta insitucija BiH za 2008. godine, podnosilac: Ured za reviziju instituciju BiH;
15. Izvještaj iz oblasti poljoprivrede za Bosnu i Hercegovinu za 2008. godinu, podnosilac: Vijeće ministara BiH;
16. Prijedlog poslovnika o radu Odbora za žalbe građana na rad policijskih službenika u policijskim tijelima BiH;
17. Program „Perspektiva“ i informacija Ministarstva odbrane BiH i Zajedničkog štaba Oružanih snaga BiH o tranziciji i zbrinjavanju personala MOBiH i OSBiH, s Mišljenjem i prijedlozima zaključaka Zajedničke komisije za odbranu i sigurnost BiH;
18. Prijedlog zaključka poslanika Jerka Ivankovića Lijanovića podnesenog na 13. zajedničkoj sjednici oba doma Parlamentarne skupštine BiH, održanoj 24.7.2009., s Mišljenjem Zajedničke komisije za evropske integracije;
19. Izvještaj komisije Kolegija o nastojanju za postizanje saglasnosti o prijedlogu zaključka delegata Ive Mire Jovića o imenovanju delegacije Parlamentarne skupštine

BiH koja će u Briselu prezenirati ispunjavanje uslova za liberalizaciju viznog režima građanima Bosne i Hercegovine;

20. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za izbor tri člana Upravnog odbora Agencije za razvoj visokog obrazovanja i osiguravanje kvaliteta;
21. Davanje saglasnosti za ratifikaciju Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske na osnovu komponente prekogranične saradnje u okviru Instrumenta pretprijetne pomoći (IPA) za 2008. godinu;
22. Davanje saglasnosti za ratifikaciju Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije na osnovu komponente prekogranične saradnje u okviru Instrumenta pretprijetne pomoći (IPA) za 2008. godinu;
23. Davanje saglasnosti za ratifikaciju Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore na osnovu komponente prekogranične saradnje u okviru Instrumenta pretprijetne pomoći (IPA) za 2008. godinu;
24. Davanje saglasnosti za ratifikaciju Kreditnog sporazuma – Projekat završetka i opremanja četiri bolnice – između Saudijskog fonda za razvoj i Bosne i Hercegovine;
25. Davanje saglasnosti za ratifikaciju Konvencije o nuklearnoj sigurnosti Međunarodne agencije za atomsku energiju, Beč, 17. juni 1994. godine;
26. Davanje saglasnosti za ratifikaciju Konvencije o promotivnom okviru sigurnosti i zdravlja na radu br. 187 iz 2006. godine i Preporuka vezana za promotivni okvir profesionalne sigurnosti i zdravlja na radu br. 197 iz 2006. godine Međunarodne organizacije rada;
27. Davanje saglasnosti za ratifikaciju Deklaracije o jačanju nacionalnih i regionalnih kapaciteta za pripravnost i reakciju na epidemije i za provođenje Međunarodnih zdravstvenih propisa (2005.);
28. Davanje saglasnosti za ratifikaciju Kodeksa postupanja po pitanju sigurnosti i zaštite radioaktivnih izvora Međunarodne agencije za atomsku energiju;
29. Davanje saglasnosti za ratifikaciju Amandmana na Konvenciju o fizičkoj zaštiti nuklearnog materijala Međunarodne agencije za atomsku energiju.

Ad. 1. Odgovori na delegatska pitanja i delegatska pitanja

Odgovore na delegatska pitanja dobili su:

Dušanka Majkić, na pitanje postavljeno na 35. sjednici Doma naroda.

Ivo Miro Jović, na pitanje postavljeno na 35. sjednici Doma naroda.

Delegati Dušanka Majkić i Ivo Miro Jović izjasnili su se da nisu zadovoljni dobivenim odgovorom.

Delegat Zoran Koprivica postavio je sljedeće pitanje Centralnoj banci BiH i Agenciji za bankarstvo BiH:

Da li se u narednom periodu planiraju mjere u bankarskoj i kreditnoj politici u BiH, pored već donijete odluke o mogućnosti reprogramiranja kredita građanima kojinsu izgubili posao zbog recesije odnosno pravnim licima, koja su u izuzetno teškoj situaciji zbog kreditne prezaduženosti i ekonomske krize.

Posebne mjere su neophodne jer je evidentno da postojeće mjere nisu dovoljne kako bi se značajnije smanjila kreditna zaduženost fizičkih i pravnih lica u BiH, te popravio socijalni status građana BiH (usklađivanje kamatnih stopa sa EU, iznošenje prekomjerne dobiti iz zemlje, likvidnost banaka u BiH, povoljniji krediti za novo zapošljavanje, uslovi kreditiranja privrede, subvecioniranje preduzetničkih i poljoprivrednih kredita, finansiranje prioriternih sektora privrede i razvojnih energetskih projekata, kreditiranje izvozno orijentirane proizvodnje a naročito sprečavanje bankarskog zelenaštva po već realiziranim kreditima praksom primjene promjenjivih kamatnih stopa).

Delegat Hazim Rančić postavio je sljedeće pitanje Vijeću ministara BiH - Ministarstvu pravde BiH i Uredu za razmatranje žalbi:

Da li Ured za razmatranje žalbi ima Pravilnik o unutrašnjoj organizaciji kao podzakonski akt na osnovu kojeg bi funkcionirao?

Delegat Adem Ibrahimpašić postavio je sljedeće pitanje Vijeću ministara BiH:

1. Zašto se Vijeće ministara BiH ne izjašnjava o zahtjevu domaće pivarske industrije za uvođenje mjera zaštite te industrije od prekomjernog uvoza?

Zahtjev za zaštitu podnesen je 8.9.2008. a na zahtjev Ministarstva vanjske trgovine i ekonomskih odnosa BiH dopunjen u septembru ove godine

2. Zašto još uvijek nije usvojen pravilnik o kvalitetu prirodnih izvorskih i prirodnih mineralnih voda?

Delegat Alma Čolo postavila je sljedeće pitanje Predsjedništvu BiH:

U Izvještaju Evropske komisije o napretku Bosne i Hercegovine za 2009. godinu na strani 16. Navedeno je da Bosna i Hercegovina ponovo propušta da izabere svog predstavnika u Komitet Vijeća Evrope za sprečavanje torture i neljudskog i ponižavajućeg tretmana (CPT). Bosna i Hercegovina je članica Konvencije Vijeća Evrope za sprečavanje torture i kao takva podliježe obavezi redovnog monitoringa ovog komiteta.

CPT je, 14.10.2009., objavio posljedni Izvještaj o Bosni i Hercegovini, nakon četvrte posjete članova Komiteta u maju ove godine.

Izvještaj sadrži niz preporuka, komentara i zahtjeva za dostavljanje informacija od Bosne i Hercegovine.

S obzirom na značaj ovog komiteta u uspostavljanju vladavine prava u svakoj državi članici Vijeća Evrope, postavljam pitanje Predsjedništvu BiH - kada će nominirati tri kandidata za izbor predstavnika Bosne i Hercegovine u CPT-u, u skladu s Rezolucijom 1540 (2007) Vijeća Evrope, kojom je regulirana procedura odabira članova CPT-a?

Također postavljam pitanje - kada će Predsjedništvo BiH nominirati člana Venecijanske komisije ispred Bosne i Hercegovine, s obzirom da je dosadašnjem članu mandat istekao prije četiri godine.

Kako i sutkinji Evropskog suda za ljudska prava iz BiH Ljiljani Mijović ističe mandat 27.1.2010., a da prema Rezoluciji Vijeća Evrope 1646 od januara 2009. godine procedura nominacije, izbora i preuzimanja mandata sudije traje do 12 mjeseci, podnosim inicijativu da se hitno pokrene procedura za nominaciju kandidata za sudiju Evropskog suda za ljudska prava ispred Bosne i Hercegovine. U protivnom, Bosna i Hercegovina ostat će i bez ove pozicije u najznačajnijoj međunarodnoj instituciji za zaštitu ljudskih prava u Evropi.

Delegat Dušanka Majkić postavila je sljedeće pitanje Tužilaštvu BiH, Upravi za indirektno oporezivanje BiH i predsjedavajućem Vijeća ministara BiH:

1. S obzirom da sam nezadovoljna odgovorom na moje pitanje postavljeno na 35. sjednici Doma naroda, održanoj 15.9.2009., veza pismo Tužilaštva BiH broj A-639/09., od 5.10.2009., molim glavnog tužioca da mi odgovori na sljedeće pitanje:
S obzirom da, prema informaciji glavnog tužioca, lice Radislav Jovičić ne prolazi kroz upisnike Tužilaštva BiH, molim informaciju da li je kroz upisnike Tužilaštva BiH prošao lični zahtjev gosp. Radislava Jovičića kojim on traži da bude procesuiran iz razloga koji su navedeni u Odluci OHR-a o njegovoj smjeni.
2. Molim Upravu za indirektno oporezivanje BiH da mi odgovori na sljedeće pitanje:
Zašto ni do danas nije uređen i priveden namjeni prostor za carinske ispostave u Skelanima i Bratuncu na graničnim prijelazima između BiH i Republike Srbije?
3. Dom naroda Parlamentarne skupštine BiH je na sjednici, održanoj 29.1.2009., jednoglasno donio sljedeći

ZAKLJUČAK

Dom naroda traži od Ministarstva prometa i komunikacija BiH da u roku od 15 dana dostavi Domu naroda potpunu informaciju o kriterijima, postupcima i načinu raspodjele CEMT dozvola za 2009. godinu domaćim prijevoznicima.

U informaciju treba uključiti broj i razlog prigovora prijevoznika, kao i žalbene postupke koji su u toku.

PRVA URGENCIJA za dostavljanje navedene informacije uslijedila je u aprilu ove godine, ali odgovor nisam dobila.

DRUGA URGENCIJA uslijedila je 13.7.ove godine, ali je i ona ostala bez odgovora.

S obzirom da je do danas prošlo gotovo devet mjeseci od usvajanja zaključka Doma, molim predsjedavajućeg Vijeća ministara BiH da mi posredstvom Ministarstva prometa i komunikacija BiH omogući potpunu informaciju o kriterijima, postupcima i načinu raspodjele CEMT dozvola za 2009. godinu domaćim prijevoznicima.

Ad. 2. Usvajanje Zapisnika 36. sjednice Doma naroda

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio Zapisnik 36.** sjednice Doma naroda.

Ad. 3. Izvještaj Zajedničke komisije oba doma o postizanju saglasnosti o identičnom tekstu Zakona o izmjenama i dopunama Zakona o osnovama sigurnosti saobraćaja na putevima u BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno **je usvojio** Izvještaj Zajedničke komisije oba doma o postizanju saglasnosti o identičnom tekstu Zakona o izmjenama i dopunama Zakona o osnovama sigurnosti saobraćaja na putevima u BiH i pa je samim tim Zakon **usvojen**.

Ad. 4. Zahtjev Predstavničkog doma za razmatranje Prijedloga zakona o izmjenama i dopunama Zakona o slobodi pristupa informacijama u BiH po skraćenom postupku, u skladu s članom 121. Poslovnika Doma naroda

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Dušanka Majkić, predstavnik predlagača Beriz Belkić, Hazim Rančić, Alma Čolo, Ilija Filipović i Branko Zrno.

Dom naroda jednoglasno **je usvojio** Zahtjev Predstavničkog doma da se Prijedlog zakona o izmjenama i dopunama Zakona o slobodi pristupa informacijama u BiH razmatra po skraćenom postupku, u skladu s članom 121. Poslovnika Doma naroda.

Ad. 5 Zahtjev Predstavničkog doma za razmatranje Prijedloga zakona o dopuni Zakona o službenom glasilu BiH po skraćenom postupku, u skladu s članom 121. Poslovnika Doma naroda

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno **je usvojio** Zahtjev Predstavničkog doma da se Prijedlog zakona o dopuni Zakona o službenom glasilu BiH razmatra po skraćenom postupku, u skladu s članom 121. Poslovnika Doma naroda.

Ad. 6. Prijedlog zakona o primjeni Rimskog statuta Međunarodnog krivičnog suda i saradnji s Međunarodnim krivičnim sudom (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno **je usvojio** Zakon o primjeni Rimskog statuta Međunarodnog krivičnog suda i saradnji s Međunarodnim krivičnim sudom u identičnom tekstu kao i Predstavnički dom.

Ad. 7. Prijedlog zakona o izmjenama i dopunama Zakona o Pravobranilaštvu BiH (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ivo Miro Jović, Hazim Rančić, Ilija Filipović, Zoran Koprivica, Božo Rajić i ministar pravde Bariša Čolak.

Delegat Hazim Rančić obnovio je jedan amandman.

Dom naroda, s tri glasa “za” i sedam glasova “protiv”, **nije usvojio** obnovljeni amandman delegata Hazima Rančića.

Nakon izjašnjenja o obnovljenom amandmanu, delegati su pristupili glasanju o Prijedlogu zakona.

Dom naroda jednoglasno **je usvojio** Zakon o izmjenama i dopunama Zakona o Pravobranilaštvu BiH s jednim amandmanom:

Amandman I.

Član 2. Prijedloga zakona o izmjenama i dopunama Zakona o Pravobranilaštvu BiH mijenja se i glasi:

„U Zakonu o Pravobranilaštvu Bosne i Hercegovine („Službeni glasnik BiH“, br. 08/02, 10/02, i 44/04.) u članu 3. u stavu (1) riječi: „deset godina“ mijenjaju se riječima: „osam godina nakon položenog pravosudnog ispita“.

U stavu (2) iza riječi: „pet godina“ dodaju se riječi: „nakon položenog pravosudnog ispita“.

S obzirom da je Zakon usvojen u različitom tekstu od onog usvojenog u Predstavničkom domu, Dom naroda osnovao je Komisiju za usaglašavanje teksta Zakona. Za

članove Komisije iz Doma naroda **imenovani su: Hilmo Neimarlija, Ivo Miro Jović i Zorana Koprivica.**

Ad. 8. Prijedlog zakona o slobodnim zonama u BiH (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno **je usvojio** Zakon o slobodnim zonama u BiH sa sljedećim amandmanima:

Amandman I.

U članu 10.u stavu (3) nakon riječi: „Slobodna zona“ dodaju se: riječi „locirana u pomorskoj ili riječnoj luci“, a ostatak rečenice ostaje nepromijenjen.

Amandman II.

U članu 11. riječi: “odgovarajuće se primjenjuju” zamjenjuju se riječima: “primjenjuju se odgovarajuće”.

Amandman III.

U članu 12. riječi: „ u roku od 12 mjeseci“ zamjenjuju se riječima: „ u roku od 24 mjeseca“.

Amandman IV.

U članu 15. u stavu (1) u tački a) riječi: „ u roku od 12 mjeseci“ zamjenjuju se riječima: „ u roku od 24 mjeseca“.

Amandman V.

U članu 19. dodaje se novi stav (2) koji glasi:
„ (2) Entiteti i Brčko Distrikt BiH usaglasit će svoje propise u roku od tri mjeseca od dana stupanja na snagu ovog zakona.“

Amandman VI.

U članu 20. riječi: „šest mjeseci“ zamjenjuju se riječima: „tri mjeseca“.

S obzirom da je Zakon usvojen u različitom tekstu od onog usvojenog u Predstavničkom domu, Dom naroda osnovao je Komisiju za usaglašavanje teksta Zakona. Za članove Komisije iz Doma naroda **imenovani su: Alma Čolo, Božo Ljubić i Slobodan Šaraba.**

Ad. 9. Prijedlog zakona o izmjenama i dopunama Zakona o sportu u BiH (drugo čitanje), predlagač: Predstavnički dom

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Ivo Miro Jović, Božo Rajić, Ilija Filipović i Branko Zrno.

Dom naroda je, s devet glasova „za“ i jednim „suzdržanim“ glasom, **usvojio** Zakon o izmjenama i dopunama Zakona o sportu u BiH **sa sljedećim** amandmanima:

Amandman I.

U članu 5. Prijedloga zakona o izmjenama i dopunama Zakona o sportu u BiH, koji se odnosi na član 28a. (Amaterski sportski klub invalidnih lica), iza riječi „sportu“ briše se ostatak teksta, a novi tekst glasi: „Republike Srpske, kantona, Brčko Distrikta BiH i drugim propisima iz oblasti sporta“.

Amandman II.

U članu 5. u dijelu koji se odnosi na član 28b. (Profesionalni sportski klub invalidnih lica) u stavu (2) riječi: „entiteta i drugih nivoa administrativnog organiziranja“ brišu se, a umjesto njih dodaje se novi tekst koji glasi: „Republike Srpske, kantona i Brčko Distrikta BiH“.

Amandman III.

U članu 5. u dijelu koji se odnosi na „član 28d. (Sportski savez invalidnih lica) u stavu (1) iza riječi „entiteta“ dodaju se riječi: „kantona i Brčko Distrikta BiH“.

U istom stavu iza riječi: „invalidna lica“ stavlja se tačka a ostatak rečenice briše se.

Amandman IV.

U članu 5. u dijelu koji se odnosi na „član 28d. (Sportski savez invalidnih lica) u stavu (2) iza riječi „odluka“ riječ „entitetskih“ mijenja se riječima: „Republike Srpske, kantona i Brčko Distrikta BiH“.

U istom stavu, u sintagmi „entitetskih saveza“ riječ „entitetskih“ mijenja se riječju „sportskih“.

Amandman V.

U članu 5. u dijelu koji se odnosi na „član 28d. (Sportski savez invalidnih lica) u stavu (4) iza riječi „entiteta“ dodaju se riječi: „kantona i Brčko Distrikta BiH“.

S obzirom da je Zakon usvojen u različitom tekstu od onog usvojenog u Predstavničkom domu, Dom naroda osnovao je Komisiju za usaglašavanje teksta Zakona. Za članove Komisije iz Doma naroda **imenovani su: Hilmo Neimarlija, Ivo Miro Jović i Zoran Koprivica.**

Ad. 10. Prijedlog zakona o izmjenama i dopunama Zakona o upravi (prvo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je **usvojio u prvom čitanju** Prijedlog zakona o izmjenama i dopunama Zakona o upravi.

Ad.11. Prijedlog zakona o izmjenama i dopunama Zakona o krivičnom postupku BiH (prvo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno je **usvojio u prvom čitanju** Prijedlog zakona o izmjenama i dopunama Zakona o krivičnom postupku BiH.

Ad.12. Prijedlog zakona o Agenciji za prevenciju korupcije i koordinaciju borbe protiv korupcije (prvo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Božo Rajić, Dušanka Majkić, Ivo Miro Jović, Hazim Rančić i Drago Ljubičić.

Dom naroda jednoglasno je **usvojio u prvom čitanju** Prijedlog zakona o Agenciji za prevenciju korupcije i koordinaciju borbe protiv korupcije.

Ad.13. Izvještaj o izvršenju Budžeta institucija BiH i međunarodnih obaveza BiH za 2008. godinu; podnosilac: Predsjedništvo BiH

Predsjedavajući Doma naroda otvorio je raspravu o ovoj tački dnevnog reda. U raspravi je učestvovala Dušanka Majkić.

Dom naroda jednoglasno **je usvojio** Izvještaj o izvršenju Budžeta institucija BiH i međunarodnih obaveza BiH za 2008. godinu sa sljedećim zaključkom:

1. Nalaže se Ministarstvu finansija i trezora BiH da preduzme neophodne mjere s ciljem unapređenja procesa planiranja, nadzora i izvršenja budžeta te o preduzetim mjerama obavijesti Komisiju za finansije i budžet.
2. Skreće se pažnja Ministarstvu finansija i tezora BiH da je dužno poštovati odredbe člana 22. stav (2) Zakona o finansiranju institucija BiH ("Sl. glasnik BiH", broj 61/04) i Parlamentarnoj skupštini BiH redovno dostavljati šestomjesečni izvještaj o izvršenju budžeta institucija BiH i međunarodnih obaveza BiH.
3. Dom naroda traži od Vijeća ministara BiH da poštuje zakonske rokove za izradu Prijedloga zakona o budžetu institucija BiH za iduću godinu.
4. Dom naroda traži od Vijeća ministara BiH da Prijedlog zakona o budžetu institucija BiH za 2010. godinu u što kraćem roku dostavi Predsjedništvu BiH kako bi što prije ovaj zakon bio upućen u parlamentarnu proceduru.

Ad.14. Izvještaj Ureda za reviziju institucija BiH o reviziji Izvještaja o izvršenju Budžeta insitucija BiH za 2008. godine, podnosilac: Ured za reviziju instituciju BiH

Predsjedavajući Doma naroda otvorio je raspravu o ovoj tački dnevnog reda. U raspravi je učestvovala Dušanka Majkić.

Dom naroda jednoglasno **je usvojio** Izvještaj Ureda za reviziju institucija BiH o reviziji Izvještaja o izvršenju Budžeta insitucija BiH za 2008. godine sa sljedećim zaključkom:

1. Nalaže se Ministarstvu finansija i trezora BiH da u roku od 60 dana od dana prijema ovog zaključka Komisiji za finansije i budžet Doma naroda dostavi Program za otklanjanje nepravilnosti u poslovanju, utvrđenih revizorskim izvještajima iz ranijih godina, kao i

preporuka iz Izvještaja o reviziji Izvještaja o izvršenju Budžeta institucija BiH za 2008. godinu.

2. Nalaže se odgovornim licima u Ministarstvu finansija i trezora BiH da odmah po prijemu ovog zaključka pristupe utvrđivanju preventivnih mjera za otklanjanje utvrđenih nepravilnosti i pokrenu postupak utvrđivanja odgovornosti zaposlenih za propuste navedene u revizorskom izvještaju, te da o preduzetim preventivnim internim mjerama protiv pojedinaca izvijeste Komisiju za finansije i budžet Doma naroda najkasnije do 31. 12. 2009.
3. Obavezuje se Vijeće ministara BiH da na jednoj od sljedećih sjednica razmotri Izvještaj o reviziji Izvještaja o izvršenju Budžeta institucija BiH za 2008. godinu i o zauzetim stavovima obavijesti Parlamentarnu skupštinu BiH.

Ad.15. Izvještaj iz oblasti poljoprivrede za Bosnu i Hercegovinu za 2008. godinu, podnosilac: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Drago Ljubičić, Adem Ibrahimpašić, Dušanka Majkić, Hazim Rančić, Ilija Filipović i ministar vanjske trgovine i ekonomskih odnosa Mladen Zirojević.

Dom naroda jednoglasno **je usvojio** Izvještaj iz oblasti poljoprivrede za Bosnu i Hercegovinu za 2008. godinu sa sljedećim zaključkom:

„Zadužuje se Vijeće ministara BiH da u roku od 60 dana izradi mjere za poboljšanje stanja u poljoprivredi, a posebno mjere koje će povećati pokrivenost uvoza – izvozom poljoprivrednih proizvoda“.

Ad.16. Prijedlog poslovnika o radu Odbora za žalbe građana na rad policijskih službenika u policijskim tijelima BiH

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno **je usvojio** Poslovnik o radu Odbora za žalbe građana na rad policijskih službenika u policijskim tijelima BiH.

Ad.17. Program „Perspektiva“ i informacija Ministarstva odbrane BiH i Zajedničkog štaba Oružanih snaga BiH o tranziciji i zbrinjavanju personala MOBiH i OSBiH, s Mišljenjem i prijedlozima zaključaka Zajedničke komisije za odbranu i sigurnost BiH

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Branko Zrno.

Dom naroda jednoglasno je **primio k znanju** Program „Perspektiva“ i informaciju Ministarstva odbrane BiH i Zajedničkog štaba Oružanih snaga BiH o tranziciji i zbrinjavanju personala MOBiH i OSBiH, s Mišljenjem i prijedlozima zaključaka Zajedničke komisije za odbranu i sigurnost BiH, kako slijedi:

1. Prima se k znanju :
 - Program tranzicije i zbrinjavanja otpuštenog personala MOBiH i OSBiH “Perspektiva”,
 - Informacija o realizaciji NATO Trust Fonda za BiH i aktivnostima Ministarstva odbrane BiH u oblasti tranzicije i zbrinjavanja personala, u toku reforme odbrane u 2004. i 2006. godini,
 - Informacija o tranziciji i zbrinjavanju personala MOBiH i OSBiH,
 - Akt pod nazivom “Pokretanje novog NATO Trust Fonda za Bosnu i Hercegovinu”;
2. Podržavaju se naponi Ministarstva odbrane BiH za izgradnju adekvatnog sistema tranzicije i zbrinjavanja otpuštenog vojnog personala i jačanja vlastitih tranzicijskih kapaciteta, kojima se vodi računa o očuvanju operativne sposobnosti Oružanih snaga BiH, iako za to ovo ministarstvo nema obavezu utvrđenu odredbama Zakona o službi u Oružanim snagama BiH;
3. Podržavaju se naponi Ministarstva odbrane BiH i Međunarodne organizacije za migracije (IOM) koji se čine s ciljem pokretanja novog NATO Trust Fonda za BiH. U tom smislu podržava se planiranje inicijalnih finansijskih sredstava u budžetu Ministarstva odbrane BiH za 2010. godinu u okviru raspoloživih mogućnosti, s obzirom da bi ova sredstva poslužila kao podsticaj donatorima za uspostavljanje novog fonda;

4. U predstojećim aktivnostima tranzicije i zbrinjavanja personala, od svih državnih organa i institucija uključenih na bilo koji način u ovaj proces očekuje se maksimalno angažiranje kako bi bili realizirani naponi Ministarstva odbrane BiH na njihovom provođenju.

Ad.18. Prijedlog zaključka poslanika Jerka Ivankovića Lijanovića podnesenog na 13. zajedničkoj sjednici oba doma Parlamentarne skupštine BiH, održanoj 24.7.2009., s Mišljenjem Zajedničke komisije za evropske integracije

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda, s tri glasa „za“ i šest glasova „protiv“, **nije usvojio** Zaključak poslanika Jerka Ivankovića Lijanovića podnesenog na 13. zajedničkoj sjednici oba doma Parlamentarne skupštine BiH.

Ad.19. Izvještaj komisije Kolegija o nastojanju za postizanje saglasnosti o prijedlogu zaključka delegata Ive Mire Jovića o imenovanju delegacije Parlamentarne skupštine BiH koja će u Briselu prezenirati ispunjavanje uslova za liberalizaciju viznog režima građanima Bosne i Hercegovine

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Ivo Miro Jović.

Dom naroda, s jednim glasom „za“, šest glasova „protiv“ i dva „suzdržana“ glasa, **nije usvojio** Prijedlog zaključka delegata Ive Mire Jovića o imenovanju delegacije Parlamentarne skupštine BiH koja će u Briselu prezenirati ispunjavanje uslova za liberalizaciju viznog režima građanima Bosne i Hercegovine.

Ad.20. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za izbor tri člana Upravnog odbora Agencije za razvoj visokog obrazovanja i osiguravanje kvaliteta

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda jednoglasno **je usvojio** zaključak Zajedničkog kolegija oba doma i imenovao Hilmu Neimarliju, Ivu Miru Jovića i Dragu Ljubičića u Privremenu zajedničku

komisiju oba doma Parlamentarne skupštine BiH za provođenje procedure za izbor tri člana Upravnog odbora Agencije za razvoj visokog obrazovanja i osiguravanje kvaliteta.

Prije prelaska na razmatranje sljedećih tačaka dnevnog reda, predsjedavajući Doma naroda predložio je da se Dom izjasni o tome da se davanje saglasnosti za ratifikaciju za sve navedene tačke objedini, što je jednoglasno usvojeno.

Predsjedavajući Doma naroda otvorio je raspravu o ovim tačkama dnevnog reda. Nije bilo delegata prijavljenih za raspravu. Dom naroda jednoglasno je dao saglasnost za ratifikaciju:

- Ad.21. Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;**
- Ad.22. Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;**
- Ad.23. Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;**
- Ad.24. Kreditnog sporazuma – Projekat završetka i opremanja četiri bolnice – između Saudijskog fonda za razvoj i Bosne i Hercegovine;**
- Ad.25. Konvencije o nuklearnoj sigurnosti Međunarodne agencije za atomsku energiju, Beč, 17. juni 1994. godine;**
- Ad.26. Konvencije o promotivnom okviru sigurnosti i zdravlja na radu br. 187 iz 2006. godine i Preporuka vezana za promotivni okvir profesionalne sigurnosti i zdravlja na radu br. 197 iz 2006. godine Međunarodne organizacije rada;**
- Ad.27. Deklaracije o jačanju nacionalnih i regionalnih kapaciteta za pripravnost i reakciju na epidemije i za provođenje Međunarodnih zdravstvenih propisa (2005.);**

**Ad.28. Kodeksa postupanja po pitanju sigurnosti i zaštite radioaktivnih izvora
Međunarodne agencije za atomsku energiju;**

**Ad.29. Amandmana na Konvenciju o fizičkoj zaštiti nuklearnog materijala
Međunarodne agencije za atomsku energiju.**

Sjednica je završena u 13,45 sati.

Sastavni dio ovog zapisnika je neautorizirani transkript 37. sjednice Doma naroda.

**SEKRETAR
DOMA NARODA**

Marin Vukoja

**PREDSJEDAVAJUĆI
DOMA NARODA**

Ilija Filipović, dipl. iur.